

28/06/1998

Gerakan sokong tentang hegemoni kewangan

KUALA LUMPUR: Parti Gerakan memberi jaminan akan terus menyokong perjuangan kerajaan menentang hegemoni kewangan dan ekonomi antarabangsa yang menyebabkan krisis ekonomi di rantau ini.

Presidennya, Datuk Seri Dr Lim Kheng Yaik, berkata keadaan hegemoni itulah yang perlu diruntuhkan bagi mencapai kestabilan dan kesaksamaan di dalam sistem kewangan antarabangsa.

"Kita memberi jaminan untuk terus menyokong perjuangan dan berdiri teguh di belakang Perdana Menteri, Datuk Seri Dr Mahathir Mohamad dalam usaha menentang hegemoni kewangan oleh kuasa kewangan monopolitik.

"Malah, rakyat negara membangun yang kecil seperti kita ini perlu meneruskan perjuangan itu tanpa jemu bagi kepentingan masa depan ekonomi.

"Kita juga tanpa mengira keturunan dan agama, perlu mengutamakan kepentingan negara daripada kehendak peribadi," katanya pada Persidangan Perwakilan Tahunan ke-27 Gerakan di sini, semalam.

Lebih 2,000 perwakilan menghadiri persidangan dua hari itu yang dirasmikan Dr Mahathir.

Hadir sama Presiden MCA, Datuk Seri Dr Ling Liong Sik dan Presiden MIC, Datuk Seri S Samy Vellu.

Dr Lim yang juga Menteri Perusahaan Utama, berkata, Malaysia juga perlu mengadakan pakatan dengan negara jiran untuk mengenal pasti media baru pertukaran bagi membiayai perdagangan antarabangsa.

"Kita perlu mencari jalan untuk menyekat pengaliran spekulatif wang panas," katanya.

Bagaimanapun, katanya, usaha mengembalikan semula keyakinan dan kesan kepada pemulihan ekonomi negara mungkin tidak berjaya sepenuhnya jika tiada tindakan bagi mengawal perdagangan mata wang di peringkat antarabangsa.

(END)